

## Naqqiut

Siunnersuut 23. august 2018-imeersoq taarsilerpaa

### Peqqut

Siunnersuutini kalaallisoortaanii – qallunaatoortaanilu assigiinngissutitaqartoq ma-lugineqarpoq.

Siunnersuutit assilisartai marluullutik assigiinnik oqaasertaqassammata aaqqissuunneqarput.

Siunnersuummut nassuiaatit

### Nalinginnaasumik nassuiaatit

#### 1. Aallarniut

Biilinit innaallagissamik ingerlatillinnut, brintimik ingerlatillinnut aamma plug-in hybridbiilinit akitsuutinik akiliinngikkallarnissaq kontomut pingaarnermut 24.11.10 aamma 24.11.11-mut oqaasertaliussat naapertorlugit 1. januar 2019-imi atorunnaassaaq.

Biilit innaallagissamik ingerlateqartut ineriartornerat siuariartorluartoq nunarsuaq tamakkerlugu takuneqarsinnaavoq. Ilaatigullu illoqarfinni annerusuni arlalinni biilit dieselimik ingerlateqartut atorunnaarsinnissaannut suliniuteqartoqarpoq. VW, BMW Mercedesilu kiisalu japanimiut biililiorfissuisa annerit siunissami biiliniq niuernermut biilit innaallagissamik ingerlateqartut akuunerat nassuerutigaat. Kinap, Frankrigip Tuluillu Nunaata 2030-40-mi biilit benziinamik dieselimillu ingerlateqartut inerteqqutigineqarnissaat siunniuppaat. Taamaammallu biilit innaallagissamik ingerlateqartut ilimagineqaqqaartumit siusinnerusukkut biilinit annertunerusumik akuunissaat naatsorsuutigineqarsinnaavoq.

Biilit innaallagissamik ingerlateqartut Nuummi illoqarfinnilu anginerusuni allani qamutinit motorilinnut nalinginnaasunut sanilliullugu ullumikkut atorneqarsinnaareerput. Biiliniq innaallagissamik ingerlateqartunik eqqussuinermit akitsuuteqartitsisoqalerpat biilit innaallagissamik ingerlateqartut qamutinit motorilinnut nalinginnaasunut unnammillerniarnerat ajornakusoornerulissaaq, taamaalillunilu Kalaallit Nunaata CO2-mik aniatitsinerata tamarmiusup annikillisinneqarnissaanik Naalakkersuisut kissaataannut akerliussalluni aammalu qamutit motorillit ikummatissanik nunap iluaneersunik atuinngitsut atorneqarnerisa annertusarniarneqarnera ajornakusoornerulissalluni.

Tamanna tunngavigalugu akitsuuteqartitsinngikkallarnerup naanerani biilnik innaallagissamik ingerlateqartunik brintimillu ingerlateqartunik eqqussuiner mi akitsuuteqartitsisoqassanngitsoq aalajangiunneqarpoq.

Akerlianik plug-in hybridbiilit ulloq 1. januar 2019-imit atuutilersumik akitsuusersugaalernissaat aalajangiunneqarpoq.

Plug-in-hybridi piunasaqaatit malillugit ator neqarpat, tassalu mootori ikummatissamik atuisoq pisariaqarluinnartillugu atortarlugu imaluunniit isorartunerusumik ingerlaassatilluni aatsaat atortarlugu, plug-in-hybridi qamutinu t mootorilinnut nalinginnaasunut sanilliullugu CO<sub>2</sub>-mik aniatitsinermut annikillisaataasinnaavoq, taamaattorli mootoritaata ikummatissanik atuisup immikkut ator neqarsinnaanera pissutigalugu plug-in-hybridi avatangiisinut ilumut iluaqutissartaqarnera qulakkeerneqanngilaq.

Siunnersuummitta qamuter alannut kiisalu qamutinu t mootorilinnut nunakkoorutinu t minnerusunut eqqussuiner mi akitsuut atorunnaarsinneqassaaq.

Inuit biilii pillugit suliaasaqarfimmi maanna akitsuutit aaqqissugaanerata nassataraa qamutit mootorillit minnerusut, soorlu assersuutigalugu nunat ilaanni microbiilit piunaneqarluartut siunertaanngitsumik annertuumik akitsuuteqartinneqarneri. Pingaartumik innuttaasut annikinnerusunik isertital lit imaluunniit killilimmik biilernissamut pisariaqartitsisut akitsuutit aaqqissugaanerata allanngortinneqarnera iluaqutigissavaat, taamaasilluni eqqussuiner mi akitsuut taamaasillunilu biilit fakturami appasinnerusumik nalillit tuneqarneranni akiat appassammat. Siunnersuummut atatillugu naatsorsuutigineqarpoq, aaqqissuusseqqinneq annertunerpaatigut nunatta karsianut iluanaarutitigut nikisitsissanngitsoq. Tamatuma kingunerisaanik inuit biiliisa 75.000 kr.-it sinnerlugit fakturami nalillit akitsuutaat qaffanniarneqarpoq.

## **2. Siunnersuummi immikkoortut pingaernerit**

Qamutit mootorillit taamaallaat innaallagissamik brintimillu ingerlateqartut kiisalu plug-in hybridbiilit, batteri inik immeqqittakkanik nukissiamut katersivillit ullumikkut qamutit mootorillit taamaallaat innaallagissamik brintimillu ingerlatillit eqqunneqarneranni nioqqutissanik eqqussuiner mi akitsuummik aamma qamutit mootorillit akileraarutaannut ilaatinneqanngillat, takuuk 2018-imut Aningaasanut Inatsimmi konto pingaarnernut 24.11.10 aamma 24.11.11 oqaasertaliussat.

Biilnik innaallagiamik brintimillu ingerlateqartunik eqqussuiner mi akitsuuteqartitsinnginneq maanna atuuttoq suli atuutsinneqassasoq siunnersuutigineqarpoq.

Akerlianik siunnersuutigineqarpoq, plug-in hybridbiilnik eqqussinermi akitsuuserneqartitsinnginneq atorunnaassasoq, tamatumalu kingorna qamutit motorillit eqqunneqarneranni malittarisassat akitsuutillu nalinginnaasut malinneqalissasut.

Siunnersuummittaaq qamuterallannut kiisalu qamutinut motorilinnut nunakkoorutitut minnerusunut eqqussinermi akitsuut atorunnaarsinneqassaaq (ATV-nik imaluunniit 4-hjulnik taagorneqartut).

Maannamut qamuterallannik eqqussinermut tunngavimusimavoq aalajangersimasumik akitsuut qamuterallannut ataatsinut 22.000 kr.-i, qamutilli motorillit nunaannakkoorutit minnerusunut ullumikkut qamutit motorillit sisamanik assakaasullit nalinginnaasut assigalugit akitsuuserneqartarput, tak. Inatsisartut inatsisaanni § 1, imm. 1, nr. 21, litra a-mi aalajangersagaq. Qamutinulli motorilinnut nunakkoorutitut minnerusunut akitsuut nioqqutissanik eqqussuineq annissuinerlu pillugu Inatsisartut inatsisaanni nr. 18, 30. oktober 1992-imeersumi § 20 naapertorlugu pisinnaatitsissutip nassataanik 5.000 kr.-imut appartinneqarpoq, tak. nioqqutissanik eqqussuineq annissuinerlu pillugu Namminersorlutik Oqartussat nalunaarutaanni § 33.

Peqatigitillugu inuit biiliinut 75.000 kr.-it ataallugit fakturami nalilinnut, 50.000 kr.-imik akitsuuteqarnissaat aalajangerneqassasoq, kiisalu inuit biiliinut 75.000 kr.-it sinnerlugit fakturami nalilinnut, fakturap nalingata 125 procentianik akitsuuteqarnissaat aalajangerneqassasoq siunnersuutigineqarpoq.

<b>Siunnersuut inatsimmut atuuttumut sanilliullugu</b>	
<b>Oqaasertai atuuttut</b>	<b>Inatsisissatut siunnersuut</b>
	<p><b>§ 1</b></p> <p>Nioqqutissanik eqqussuinermi akitsuutit pillugit Inatsisartut inatsisaanni nr. 19, 30. oktober 1992-imeersumi ilaatigut Inatsisartut inatsisaanni nr. 5, 6. oktober 1999-imeersumi kingusinnerpaamillu Inatsisartut inatsisaanni nr. 2, 25. maj 2016-imeersumi allanngortinneqartumi, tulliuuttut allannguutigineqarput:</p>
<b>§ 1, imm. 1, nr. 20.</b>	<i>§ 1, imm. 1, nr. 20 atorunnaarsinneqarpoq</i>
	<b>2.</b> <i>§ 1, imm. 1, nr. 21-mi litra e-p kingorna ilanngunneqassaaq litra f.</i>

	<p>” f) Plug-in-hybridbiilnik, batteerinik innaallagialq atorlugu immeqqinneqarsinnaasunik ingerlatilinnik aammalu immeqqinnermi ataasiinnarmi annikinnerpaamik 20 km-inik ingerlasinnaasunik eqqussinnermi taakku akilerneqarneranni nalingata 50 pct.-iannik akitsuuteqartitsisoqassaaq.”</p>
<p>a) Inuit biilii: Akitsuut aalajangersimasumik 50.000 koruuniusoq, taassumalu saniatigut fakturami akiata, 50.000 koruuninit annerusup 150.000 koruuninilli minnerusup 100%-ia aammalu sinneruttup 125%-ia akilerneqassapput.</p>	<p><b>2. § 1, imm. 1, nr. 21, litra a, ima oqaasertalerneqarpoq:</b> ” a) Inuit biilii: Fakturami naliusup 75.000 kr.-i qaanginnippagu, 50.000 kr.-imik akitsuusiisoqassaaq. Fakturami naliusup 75.000 kr.-i qaangerpagu, fakturami naliusup 125 procentianik akitsuusiisoqassaaq”</p>
<p><b>§ 3, imm. 1, nr. 1.</b> Akitsuuserneqartussaannngitsut makkuupput: 1) Qamutit motorillit, tak. § 1, imm. 1, nr. 21, a) qatserutitut annaassiniutitullu immikkut sananeqarsimasut taamatuinnarlu atorneqartut, b) ambulancetut toqusunullu assartuutitut iiranikkut sananeqarsimasut taamatuinnarlu atorneqartut, c) sulinermi immikkut atugassatut sananeqarsimasut, sananeqaamminni assartugassanik inunnilluunniit aqqusinnermi assartuutissatut naatsorsuussaannngitsut, d) maskinat sulinermi atortut traktorillu, e) naalagaaffiit allat aallartitaqarfiinit konsuuleqarfiinilluunniit sulisunit tikisitanit pigineqartut.</p>	<p><b>3. § 3, imm. 1, nr. 1, ima oqaasertalerneqassaaq:</b> ” <b>§ 3.</b> Akitsuuserneqartussaannngitsut tassaapput: 1) Qamutit motorillit, tak. § 1, imm. 1, nr. 21, a) qatserutitut annaassiniutitullu immikkut sananeqarsimasut taamatuinnarlu atorneqartut, b) ambulancetut toqusunullu assartuutitut immikkut sananeqarsimasut taamatuinnarlu atorneqartut, c) sulinermi immikkut atugassatut sananeqarsimasut, sananeqaamminni assartugassanik inunnilluunniit aqqusinnermi assartuutissatut naatsorsuussaannngitsut, d) maskinat sulinermi atortut traktorillu, e) naalagaaffiit allat aallartitaqarfiinit konsuuleqarfiinilluunniit sulisunit tikisitanit pigineqartut f) qamutit motorillit nunaannakkoorutit minnerusut sisamanik amerlanernilluunniit assakaasullit, aamma</p>

	g) qamutit motorillit taamaallaat innaallagissamik brintimillu ingerlatillit.”
	§ 2 Inatsisartut inatsisaat ulloq 1. januar 2019-imi atuutilissaaq.

### 3. Pisortanut aningaasaqarnikkut allaffissornikkullu sunniutissai

Qamuteralaat ATV-llu eqqunneqarnerani akitsuummik akiliisussaajunnaartitsinermi pisortanut iluanaarutissaagaluanik annaasaqarnermik kinguneqassaaq. Piffissami 2014-2017-imi qamuteralannik ATV-nillu eqqussinermi ukiumut agguaqatigiissillugu iluanaarutaasimapput 6.017.000 kr.-it aamma 427.500 kr.-it. Taamaattumik katillugu 6.444.500 kr.-inik iluanaarutininik annaasaqarneruvoq.

Aappaatigut plug-in hybridbiilnik eqqussinermi akitsuummik akiliisussannginnerup atorunnaarsinneranut atatillugu iluanaaruteqarnerusoqassaaq. Piffissami 2014-2017-imi agguaqatigiissillugu ukiumut plug-in hybridbiilit 65-it eqqunneqartarput. Akiligassat nalinga agguaqatigiissillugu 250.000-iusoq eqqarsaatigissagaanni, iluanaarutaaneruset katillugit 8.125.000-iussapput.

Plug-in hybridbiilit eqqunneqarnerani akitsuuteqartitsinnginnermik atorunnaarsitsinermi iluanaarutaanerussusaasut missingernerat annertuumik nalorninarartoqarpoq. Piffissami 2014-2017-imi 8, 36, 77 aamma 137-inik biilnik eqqussisoqarpoq. Allatut oqaatigalugu ukiuni kingullerni annertuumik allanngortoqarsimavoq, nalorninarporlu, akiligassat nalingani eqqussinermi akitsuutinut niuerfik qanoq qisuariassanersoq. Peqatigitillugu plug-in hybridbiilit eqqunneqartut akiisa nalingi pillugit naatsorsuutinik peqanngilaq, taamaasilluni akiligassap nalinga agguaqatigiissillugu 250.000 kr.-iusoq missingiutaavoq.

Tabelimi ataaniittumi takutinneqarpoq piumasagaatit taaneqartut atorlugit ataatsimut naatsorsuineq. Ataatsimut isigalugu 1.930.566 kr.-inik iluanaarnerusoqassasoq naatsorsuutigineqarpoq. Iluanaarnerunerup annertussusaanut annertuumik apeqqutaavoq, plug-in hybridbiilit eqqussinermi akitsuuteqartinneqalernerannut niuerfik qanoq qisuariassanersoq.

Biilit eqqunneqartut amerlassusaat nikeriarujussanngitsoq naatsorsuutigineqarpoq, biilit suussutsinit allanit taarserneqarsinnaammata. Aappaatigut kompositionseffekteqarnissaa

naatsorsuutigineqarsinnaavoq, t.i. biilit qanoq ittut eqqunneqartartut allanngornerat. Plug-in hybridbiilinit biilinit innaallagiartortunut brintimillu ingerlateqartunut nuuttoqarpat, iluanaarutaanerussat missingernerat qaffasippallaassaaq, biilimmi taakku sulii eqqussinermi akitsuuteqartinneqanngimmata.

	Siornatigut	Kingorna
Qamuteralaat	6.017.000 kr.	-
ATV/4-hjulit	427.500 kr.	-
Plug-in hybridbilit	-	8.125.000 kr.
<i>Eqqunneqartut katillugit (missingiut)</i>	-	65
<i>Akiligassat nalinga agguaqatigiissillugu (missingiut)</i>	-	250.000 kr.
<i>Akileraarut</i>	-	50%
Biilit innaallagiartortut	-	-
<b>Katillugit</b>	<b>6.444.500 kr.</b>	<b>8.375.066 kr.</b>
<b>Nikigassut (kingorna - siornatigut)</b>		<b>1.930.566 kr.</b>

Inuit biilii akitsuusersukkat katillugit 384-it 2017-imi eqqunneqarput. Akitsuutit akileneqartut tunngavigalugit biilit fakturap nalingi naatsorsorneqarsinnaapput (fakturap nalinga 50.000 kr.-i sinnerpagu). Akitsuutit akileneqartut katillugit kr. 34.700.000-iupput. Sanilliullugu siunnersuut maanna katillugit kr. 37.000.000-inik iluanaaruteqartitsissaaq, tamanna isumaqarpoq, siunnersuut ukiumut kr. 2.300.000-inik iluanaaruteqartitsinerussaaq. Matumani naatsorsorneqanngilaq inuit biiliinik fakturami nalikinnerusunik piumasaqarnerup allanngorinnaanera. Peqatigitillugu naatsorsorneqanngilaq inuit biiliinik piumasaqarnerup qaffassinnaanera. Ataatsimut isigalugu tunngavigineqarpoq, allanngortiterineq nunatta karsianut iluanaarutitigut nikisitsissanngitsaq.

Siunnersuut allaffissornikkut annertunerusumik sunniuteqassanganneqanngilaq.

#### **4. Inuussutissarsiornermut aningaasaqarnikkut allaffissornikkullu sunniutissai**

Inuussutissarsiummik ingerlataqartut hybrid-pluginbiiliniq pissarsisarnerminni aningaasartuutaat amerlissapput, eqqussuinerumut akitsuuteqartinneqannginnerat atorunnaassamat. Assiganiq naatsorsuutigineqarpoq inuit biiliinik 75.000 kr.-it sinnerlugit fakturami nalilinnik pisinernut aningaasartuutit qaffannissaat, aappaatigulli qamutiniq motoorilinnik 75.000 kr.-it ataallugit fakturami nalilinnik pisinermi aningaasartuutit appassallutik.

Siunnersuut inuussutissarsiornermut allaffissornikkut sunniuteqassanganneqanngilaq.

## **5. Avatangiisinut, pinngortitamut inuillu peqqissusaannut sunniutissai**

Plug-in hybridbiilit eqqussuinermit akitsuuteqartinneqannginnerat maanna attuuttup atorunnaarsinnissaanik siunnersuut plug-in hybridbiilit siaruariartornerannik annikinnerulersitsissasoq ilimagineqarpoq. . Manna tikillugu plug-in hybridbiilit avatangiisinut pitsaaqutai nalornissutaapput, taamaammallu siunnersuutip partikilini aniatitsinermit sunniutissaa siumoortumik oqaatigiuminaalluni.

Qamutit motorillit nunakkoortit minnerit qamuteralaallu akitsuummumt ilaajunnaarsinnissaannik siunnersuuteqarneq, taakku atugaanerini annertuseriartitsisussatut ilimagineqarpoq, taamaalillunilu qamutini motorilinnit taakkunanga CO2-mik aniatitsinerulernermik nassataqassataqassaaq.

Taamattaarlu qamutit motorillit 75.000 ataallugit nalillit akitsuutaannik appaanissaq qamutini motorilinnik minnernik eqqussuinermit annertusisitsissasoq ilimagineqarpoq, innuttaasummi amerlanerit qamutini motorilinnik pisinissamut periarfissaqalissapput. Qamutit motorillit amerlanerulernerat CO2-mik aniatitap annertusineranik nassataqassaaq.

## **6. Innuttaasunut sunniutissai**

Innuttaasut hybrid-pluginbiilini pisisut biilit eqqunneqarnerannut atatillugu ataasiartumik aningaasartuutini sipaaruteqarsinnaajunnaassapput. Akitsuuteqartitsisoqanngikkaluartoq hybrid-pluginbiilit eqqunneqartut maannamut ikittuinnaat eqqunneqarnikuupput. Plug-in-hybrid biilit akitsuusersorneqalerpata hybrid-plugin-biilini eqqussuineq annertuumik annikilleriassasoq ilimagineqartariaqarpoq.

Inuit biilini 75.000 kr-it sinnerlugit fakturami nalilinnik pisinermi innuttaasut aningaasartuutaat qaffariassapput, appaanili inuit biilini 75.000 kr.-it ataallugit fakturami nalilinnik pisinermi aningaasartuutaat appassallutik.

Siunnersuut allaffissornikkut innuttaasunut sunniuteqassanganneqanngilaq.

## **7. Sunniutissat allat annertuut**

Siunnersuut allanik annertuunik sunniuteqassanganneqanngilaq.

## **8. Oqartussaasunik, kattuffinnik il.il. tusarniaaneq.**

Siunnersuut piffissami 13. juulimit 10. augustimut 2018 makkununga tusarniaassutigineqarpoq: Kommuneqarfik Sermersooq, Kommune Kujalleq, Qaasuitsup

Kommunia, Qeqqata Kommunia, Sulisitsisut, NUSUKA, SIK, Inuussutissarsiornermut Nukissiuuteqarnermullu Naalakkersuisoqarfik, Peqqissutsimut Iisimatusarnermullu Naalakkersuisoqarfik, Pinngortitamut Avatangiisinullu Naalakkersuisoqarfik, Ilinniartitaanermut, Kultureqarnermut Ilageeqarnermullu Naalakkersuisoqarfik, Isumaginninnermut Inatsisinillu Atuutsitsinermit Naalakkersuisoqarfik, Aalisarnermut, Piniarnermut Nunalerinerimullu Naalakkersuisoqarfik, Ineqarnermut Attaveqatigiinnermullu Naalakkersuisoqarfik, Aatsitassanut, Suliffeqarnermut Nunamullu Namminermit Naalakkersuisoqarfik, Nunanut Allanut Nukissiorfinnullu Naalakkersuisoqarfik kiisalu Naalakkersuisut tusarniaaviat.

Tamatuma saniatigut piffissami tassani siunnersuut tusarniaanermut nittartakkami takuneqarsinnaavoq.

Piffissap tusarniaaffiusup naanerani tusarniaaffigisanit ukunanit tusarniaanermut akissutit tiguneqarput: Nunanut Allanut Naalakkersuisoqarfik, Isumaginninnermut Inatsisinillu Atuutsitsinermit Naalakkersuisoqarfik, Naalakkersuisut Siulittaasuata Naalakkersuisoqarfia, Pinngortitamut Avatangiisinullu Naalakkersuisoqarfik, Inuussutissarsiornermut Nukissiuuteqarnermullu Naalakkersuisoqarfik, KNAPK, Kommuneqarfik Sermersooq, Sulisitsisut, Arctic Star ApS, AutoNord ApS, Nukissiorfiit, Aatsitassanut, Suliffeqarnermut Nunamilu namminermit Pissutsinut Naalakkersuisoqarfik aamma Kommune Kujalleq.

Tamatuma saniatigut innuttaasut arlallit siunnersuummik tusarniaanermut akissuteqarput.

Tusarniaanermut akissutit ilanngussami ilanngunneqartumi takuneqarsinnaapput.



## **Siunnersuummi aalajangersakkanut ataasiakkaanut nassuiaatit**

### *§ 1-imut*

Nr. 1-imut

Snescooterinut akitsuut atorunnaarsinneqassaaq.

Nr. 2-mut

Siunnersuutigineqarpoq, inuit biiliinik 75.000 kr.-it ataallugit fakturami nalilinnik eqqussinermi akitsuut, 50.000 kr.-imut aalajangerneqassasoq.

Inuit biiliinik 75.000 kr.-it sinnerlugit fakturami nalilinnik eqqussinermi akitsuut, ataatsimut fakturap nalingata 125 procentianut aalajangerneqassaaq. Inuit biiliat ass. Eqqussinermi 120.000 kr.-inik fakturami naleqarpat, akitsuut ima naatsorsorneqassaaq 120.000 kr. x 125 procent = 150.000 kr.

Nr. 3-mut

Siunnersuutigineqarpoq, qamutit motorillit nunaannakoorutit minnerusut sisamanik amerlanernilluunniit assakaasullit, Kalaallit Nunaanni angallanneq pillugu inatsimmi § 2, imm. 1, nr. 3 naapertorlugu qamutiusut motorillit akitsuuteqartinneqarunnaassasut.

Aalajangersakkami assersuutigalugu ilanngunneqarput ATV-t aamma UTV-t tassaasut qamutit motorillit immikkut ittut nunaannarmi ingerlanissamut tulluarsakkat, taamaattumillu mangertumi assersuutigalugu betonimi imaluunniit asfaltimi ingerlanissamut tulluarsaangaangitsut. Qamutit motorillit sisamanik assakaasoqakkajupput kiisalu minnerusumik usinut ilitsiveqarsinnaallutik. Qamutit motorillit aquneqartarput motorcykelit aquutaasa assignanik aquuteqarlutik.

Aammattaq qamutit motorillit innaallagissamik imaluunniit brintimik ingerlatillit eqqussinermi akitsuuserneqassanngitsut siunnersuutigineqarpoq.

Aalajangersakkami pineqartut taamaallaat tassaapput biilit innaallagissamik brintimillu ingerlatillit, batterimik innaallagissamik immeqqinneqarsinnaasumik ingerlateqartut aammalu allamik atuinikkut ingerlanneqanngitsut. Brintibiilit ingerlataat brinti, soorlu elektrolyseproces atorlugu pilersinneqarsimasinnaavoq, tassa erngup silaannaallu avissaartinneqarnerisigut. Biilit allanik ingerlateqarnissamut atortulersugaareersimassanngillat.

*§ 2-mut*

Inatsisartut inatsisaat 1. januar 2019-imi atuutilissaaq.